



片玉集目錄

卷之一

春景

瑞龍吟

大石

盧藏用夜聞龍吟聽其聲清越乃作瑞龍吟

瑣窗寒

越調

風流子

大石

渡江雲

小石

應天長

商調

荔枝香

歇指

唐禮樂志云帝幸驪山楊貴妃生日命小部張樂長生殿因奏新曲未有名適南方進荔枝因名曰荔枝香楊妃外傳亦云

還京樂

大石

明皇自潞州入平內難半夜斬長樂門關領兵入宮剪逆後撰半夜樂此曲名還京樂

掃花遊

雙調



周邦彥

美成



卷之二

春景

解連環

商調

莊子曰南方無窮而有窮今日適越而

玲瓏四犯

大石

昔來連環可解也

丹鳳吟

越調

滿江紅

仙呂

瑞鶴仙

高平

西平樂

小石

后漢書注曰樂觀名在城之西

浪濤沙

商調

卷之三

春景

驀山溪

大石

少年遊

黃鍾

秋葉香

雙調

漁家傲

般涉

楚大夫往見莊子持竿不顧是漁家傲也

南鄉子

商調

晉高國士全隱于南鄉因以為氏也

望江南

大石

樂府雜錄望江南始自李德裕鎮浙西日為亡妓謝秋娘撰本名謝秋娘后改

望江南

浣沙溪

黃鍾

迎春樂

雙調

點絳脣

仙呂

一落索

雙調

垂絲釣

商調

卷之四

夏景

滿庭芳

中呂

隔浦蓮

大石

法曲獻仙音

大石

唐志元宗知音律又酷愛法曲又云夢仙于十輩御卿雲而下列于庭各親樂

器獻仙音也

過秦樓 大石

側犯 大石

塞翁吟 大石

蘇幕遮 般涉

浣沙溪 黃鍾

點絳脣 仙呂

調衷情 商調

卷之五

秋景

風流子 大石

華胥引 黃鍾

宴清都 中呂

四園竹 小石 官本四作西

齊天樂 小石 蓋取與天齊壽之義

木蘭花 高平

霜葉飛 大石

蕙蘭芳引 仙呂

塞垣春 大石

丁香結 商調

卷之六

秋景

氏州第一 商調

解蹀躞 商調

少年遊 商調

慶春宮 越調

醉桃源 大石

點絳脣 仙呂

夜遊宮 非是般涉仙呂 或云明皇與虢國夫人正月十五日夜游宮中觀燈

訴衷情 商調

傷情怨 林鍾

冬景

紅林擒近 雙調

滿路花 仙呂

卷之七

單題

解語花 元宵 高平 明皇與貴妃共賞太液池千葉蓮指貴妃謂左右曰何如此解語花

六么令 九日 仙呂

倒犯 新月 仙呂

大酺 春雨

玉燭新 梅花 雙調

花犯 梅花 小石

醜奴兒 梅花 大石

水龍吟 梨花 越調

六醜 落花 中呂

虞美人 正宮

卷之八

單題

蘭陵王 柳 越調 北齊蘭陵王長恭白皙而美風姿乃著假面對敵數立功作舞傲之齊人曰面舞

蝶戀花 柳 商調

西河 金陵 大石 大厓初有樂工撰新曲長命西河女也加減節奏頗有新聲

歸去難 期約 仙呂

三部樂 梅雪 商調 南史羊侃嘗燕賓客三百餘人奏三部樂至夕侍婢俱執金花燭

菩薩蠻 梅雪 正平 唐大和中初女蠻國貢獻其人皆危髻金冠瓔珞被體故謂菩薩蠻

品令 梅花 商調

玉樓春 惆悵 仙呂

黃鸝繞碧樹 春情 雙調

卷之九

雜賦

綺寮怨 思情 中呂

拜星月慢 秋思 高平

尉遲杯 離恨 大石

繞佛閣 旅情 大石

一寸金 江落 小石

蝶戀花 秋思 商調

如夢令 思情 中呂 唐莊宗詞云如夢如夢和淚出門相送

月中行 怨恨

浣沙溪 黃鍾

點絳脣 感傷 仙呂

少年游 樓月 商調

望江南 詠妓 大石

卷之十

雜賦

意難忘 美詠 中呂

迎春樂 攜妓 雙調

定風波 美情 商調

紅羅襖 秋思 大石

玉樓春 大石

夜飛鵲 別情 正宮

早梅芳 別恨 正宮

鳳來朝 佳人 越調

芳草渡 別恨

感皇恩 標韻 大石

虞美人

正宮

片玉集目錄

拾遺目錄

蘇幕遮

春情

憶王孫

夏景

浣沙溪

憶舊游

秋思

玉女搖仙珮

一作柳屯田

滿庭芳

秋思

片玉集卷之一

春景

瑞龍吟

大石 春情

章臺路還見褪粉梅梢試花桃樹悵悵坊陌人家定
 巢燕子歸來舊處黯凝竚因念箇人癡小乍窺門
 戶侵晨淺約宮黃障風映袖盈盈笑語前度劉郎
 重到訪鄰尋里同時歌舞惟有舊家秋娘聲價如故
 吟牋賦筆猶記燕臺句知誰伴名園露飲東城間步
 事與孤鴻去撥春盡是傷離緒官柳低金縷歸騎晚
 纖纖池塘飛雨斷腸院落一簾風絮

瑣窗寒

越調 寒食

暗柳啼鴉單衣竚立小簾朱戶桐花半畝靜鎖一庭
 愁雨洒空階夜闌未休故人剪燭西窗語似楚江暝



風燈零亂少年羈旅遲暮嬉遊處正店舍無煙禁城
百五旗亭喚酒付與高陽儔侶想東園桃李春小脣秀
靨今在否到歸時定有殘英待客攜尊俎

風流子

大石

新綠小池塘風簾動碎影舞斜陽羨金屋去來舊時
巢燕土花繚繞前度葦牆繡閣鳳幃淡幾許曾聽得
理絲簧欲說又休慮乖芳信未歌先咽愁近清觴
遙知新妝了開朱戶應自待月西廂最苦夢魂今宵
不到伊行問甚時說與佳音密耗寄將秦鏡偷換韓
香天便教人霎時斷見何妨

渡江雲

小石

晴嵐低楚甸暖回雁翼陣勢起平沙驟驚春在眼借
問何處委曲到山家塗香暈色盛粉飾爭作妍華千
萬絲陌頭楊柳漸漸可藏鴉堪嗟清江注畫舸西

流指長安日下愁宴闌風翻旗尾潮濺烏紗今宵正
對初弦月傍水驛淡艤蒹葭沈恨處時時自剔燈花

應天長

商調

寒食

條風布暖霏霧弄晴池塘徧滿春色正是夜堂無月
沈沈暗寒食梁間燕社前客侶笑我閉門愁寂亂花
過隔院菲香滿地狼籍長記那回時邂逅相逢郊
外駐油壁又見漢宮傳燭飛煙五侯宅青青草迷路
陌強載酒細尋前迹車橋邊柳下人家猶自相識

荔枝香

照水殘紅零亂風喚去盡日惻惻輕寒簾底吹香霧
黃昏客枕無慘細響當窗雨看兩兩相依燕新乳
樓下水漸綠徧行舟浦暮往朝來心逐片帆輕舉何
日迎門小檻朱籠報鸚鵡共剪西窗蜜炬

第二

夜來寒侵酒席露微泣烏履初會香澤方熏無端暗
雨催人但怪燈偏簾捲回顧始覺驚鴻去雲遠大
都世間最苦惟聚散到得春殘看即是開離宴細思
別後柳眼花鬚更誰剪此懷何處消遣

還京樂

大石

禁煙近觸處浮香秀色相料理正泥花時候柰何客
裏光陰虛費望箭波無際迎風漾日黃雲委任去遠
中有萬點相思清淚到長淮底過當時樓下慙慙
爲說春來羈旅況味堪嗟誤約乖期向天涯自看桃
李想而今應恨墨盈牋愁妝照水怎得青鸞翼飛歸
教見憔悴

掃花遊

雙調

曉陰翳日正霧靄煙橫遠平迷楚暗黃萬縷聽鳴禽
按曲小腰欲舞細繞回隄駐馬河橋避雨信流去想

一葉怨題今在何處春事能幾許任占地持盃掃
花尋路淚珠濺俎歎將愁度日病傷幽素恨入金徽
見說文君更苦黯凝竚掩重關徧城鍾鼓

咸豐丙辰季冬入城向汪鐵樵千戶借得此舊鈔本係汪氏
振綺堂舊藏祀竈日錄臚卿記 是夕上元朱述之司馬為
迎新出城舟次塘棲見過艸堂并招季言來譚明日又記

片玉集卷之二

春景

解連環

商調 春情

周邦彥 美成

怨懷難託嗟情人斷絕信音遼邈信妙手能解連環
侶風散雨收霧輕雲薄燕子樓空暗塵鎖一牀絃索
想移根換葉盡是舊時手種紅藥汀洲漸生杜若
料舟移岸曲人在天角謾記得當日音書把閒語閒
言盡摠燒却水驛春回望寄我江南梅萼拚今生對
花對酒為伊淚落

玲瓏四犯

大石 春情

穠李天桃是舊日潘郎親試春豔自別河陽長負露
房煙臉憔悴鬢點吳霜念想夢魂飛亂歎畫闌玉砌
都換纔始有緣重見 夜滾偷展香羅薦暗窗前醉

眠葱蒨浮花浪蕊都相識誰更曾擡眼休問舊色舊
香但認取芳心一點又片時一陣風雨惡吹分散

丹鳳吟

越調 春情

迤邐春光無賴翠藻翻池黃蜂遊閣朝來風暴飛絮
亂投簾幕生憎暮景倚牆臨岸杏靨天邪榆錢輕薄
晝永惟思倚枕睡越無慘殘照猶在庭角 況是別
離風味坐來但覺心緒惡痛引澆愁酒柰愁濃如酒
無計消鑠那堪昏暝藪藪半簷花落弄粉調朱柔素
手問何時重握此時此意長怕人道著

滿江紅

仙呂

晝日移陰攬衣春帷睡足臨寶鑑綠雲撩亂未忺妝
束蝶粉蜂黃都褪了枕痕一線紅生肉背畫闌脈脈
悄無言尋碁局 重會面猶未卜無限事縈心曲想
秦箏依約舊尚鳴金屋芳草連天迷遠望寶香熏被

成孤宿最苦是蝴蝶滿園飛無人撲

瑞鶴仙

高平 春情

悄郊原帶郭行路永客去車塵漠漠斜陽映山落斂
餘紅猶戀孤城闌角凌波步弱過短亭何用素約有
流鶯勸我重解繡鞍緩引春酌 不記歸時早暮上
馬誰扶醒眠朱閣驚颺動幕扶殘醉繞紅藥歎西園
已是花淡無地東風何事又惡任流光過却猶喜洞
天自樂

西平樂

小石

穉柳蘇晴故溪歇雨川迴未覺春賒駝褐寒侵正憐
初日輕陰抵死須遮歎事逐孤鴻盡去身與塘蒲共
晚爭知向此征途迢遞佇立塵沙追念朱顏翠髮曾
到處特地使人嗟 道連三楚天低四野喬木依前
臨路欹斜重慕想東陵晦迹彭澤歸來左右琴書自

片玉集卷之二
樂松菊相依何況風流鬢未華多謝故人親馳鄭驛
時倒融尊勸此淹留共過芳時翻令倦客思家

浪濤沙 商櫛 恨別

畫陰重霜凋岸草霧隱城堞南陌脂車待發東門帳
飲乍闕正拂面垂楊堪纜結掩紅淚至手親折念漢
浦離鴻去何許經時音信絕 情切望中地遠天闊向
露冷風清無人處耿耿寒漏咽嗟萬事難忘惟是輕
別翠尊未竭憑斷雲留取西樓殘月羅帶光銷紋衾
疊連環解舊香頓歇怨歌永瓊壺敲盡缺恨春去不
與人期弄夜色空餘滿地梨花雪

片玉集卷之二

小除夕錄一

片玉集卷之三

春景

驀山溪 大石

周邦彥 美成

湖平春水菱苕縈船尾空翠入衣襟拊輕棹遊魚驚
避晚來潮上迤邐沒沙痕山四倚雲漸起鳥度屏風
裏 周郎逸興黃帽侵雲水落日媚滄洲一棹猶夷
未已玉簫金管不共美人遊因箇甚烟霧底獨愛尊
羹美

少年遊 黃鍾

南都石黛掃晴山衣薄柰朝寒一夕東風海棠花謝
樓上捲簾看而今麗日明如洗南陌煖雕鞍舊賞
園林喜無風雨春鳥報平安

第二

朝雲漠漠散輕絲樓閣淡春姿柳泣花啼九街泥重
門外燕飛遲而今麗日明金屋春色在桃枝不似
當時小橋衝雨幽恨兩人知

秋葉香

雙調

乳鴨池塘水煖風緊柳花迎面午妝粉指印窗眼曲
裏長眉翠淺問知社日停針線撥新燕寶釵落枕
春夢遠簾影參差滿院

漁家傲

般涉 春情

灰暖春融銷永晝蒲萄架上春藤秀曲角闌干羣雀
鬪清明後風梳萬縷庭前柳日照釵梁光欲溜循
階竹粉沾衣袖拂拂面紅如著酒沈吟久昨宵正是
來時候

第二

幾日輕陰寒惻惻東風急處花成積醉踏陽春懷故

國歸未得黃鸝久住如相識賴有蛾眉能暖客長
屢勸金盃側歌罷月痕來照席貪歡適簾前重露
涓滴

南鄉子

商調

晨色動妝樓短燭熒熒悄未收自在開簾風不定颼
颼池面冰漸趁水流早起怯梳頭欲綰雲鬟又却
休不會沈吟思底事凝眸兩點春山滿鏡愁

望江南

大石

遊妓散獨自繞回隄芳草懷烟迷水曲密雲銜雨暗
城西九陌未沾泥桃李下春晚未成蹊牆外見花
尋路轉柳陰行馬過鶯啼無處不悽悽

浣沙溪

黃鍾

爭挽桐花兩鬢垂小妝弄影照清池出簾踏鞵趁蜂
兒跳脫添金雙腕重琵琶撥盡四絃悲夜寒誰肯

朝雲漠漠散輕絲樓閣淡春姿柳泣花啼九街泥重
門外燕飛遲而今麗日明金屋春色在桃枝不似
當時小橋衝雨幽恨兩人知

秋葉香

雙調

乳鴨池塘水煖風緊柳花迎面午妝粉指印窗眼曲
裏長眉翠淺問知社日停針線揆新燕寶釵落枕
春夢遠簾影參差滿院

漁家傲

般涉 春情

灰暖春融銷永晝蒲萄架上春藤秀曲角闌干羣雀
鬪清明後風梳萬縷庭前柳日照釵梁光欲溜循
階竹粉沾衣袖拂拂面紅如著酒沈吟久昨宵正是
來時候

第二

幾日輕陰寒惻惻東風急處花成積醉踏陽春懷故

國歸未得黃鸝久住如相識賴有蛾眉能暖客長
歌屢勸金盃側歌罷月痕來照席貪歡適簾前重露
成涓滴

南鄉子

商調

晨色動妝樓短燭熒熒悄未收自在開簾風不定颼
颼池面冰漸趁水流早起怯梳頭欲綰雲鬢又却
休不會沈吟思底事凝眸兩點春山滿鏡愁

望江南

大石

遊妓散獨自繞回隄芳草懷烟迷水曲密雲銜雨暗
城西九陌未沾泥桃李下春晚未成蹊牆外見花
尋路轉柳陰行馬過鶯啼無處不悽悽

浣沙溪

黃鍾

爭挽桐花兩鬢垂小妝弄影照清池出簾踏鞵趁蜂
兒跳脫添金雙腕重琵琶撥盡四絃悲夜寒誰肯

剪春衣

第二

雨過殘紅濕未飛
珠簾一帶透斜暉
遊蜂釀蜜竊香歸
金屋無人風竹亂
夜篝盡日水沈微
一春須有憶人時

第三

樓上晴天碧四垂
樓前芳草接天涯
勸君莫上最高梯
新筍已成堂下竹
落花都木燕巢泥
忍聽林表杜鵑啼

迎春樂

雙調

清池小圃開雲屋
結春伴往來熟
憶年縱酒杯行速
看月上歸禽宿
牆裏脩篁森似束
記名字曾刊新綠
見說別來長泐翠
蘚封蒼玉

第二

冷字係舊校

桃蹊柳曲間蹤跡
俱曾是大隄客
解春衣賞酒城南陌
頻醉臥胡姬側
鬢點吳霜嗟早白
更誰念玉溪消息
他日水雲身相望
處無南北

點絳脣

仙呂

臺上披襟快風一瞬
收殘雨柳絲輕舉
蛛網粘飛絮
極目平蕪應是春歸處
愁凝竚楚歌聲苦
村落黃昏鼓

一落索

雙調

眉共春山爭秀
可憐長皺
莫將清淚濕花枝
恐花也如人瘦
清潤玉簫閒久
知音稀有
欲知日日倚闌愁
但問取庭前柳

第二

杜宇思歸聲苦
和春催去
倚闌一霎酒旗風
任撲面桃花雨
目斷隴雲江樹
難逢尺素
落霞隱隱日平

西料想是分攜處

垂絲釣

商調

縷金翠羽妝成纔見眉
嫵倦倚繡簾看舞風絮愁幾
許寄鳳絲雁柱
春將暮向層城苑路鈿車侶
水時花徑相遇舊游伴侶
還到曾來處門掩風和雨
梁間燕語問那人在否

片玉集卷之三

除夕錄漚喜亭主記

片玉集卷之四

夏景

滿庭芳

中呂

風老鸚雛雨肥梅子午
陰嘉樹清圓地卑山近
衣潤費爐烟人靜烏鳶自樂
小橋外新綠濺濺凭闌久
黃蘆苦竹擬泛九江船
年年如社燕飄流瀚海來寄
脩椽且莫思身外長近
尊前憔悴江南倦客不堪聽
急管繁絃歌筵畔先安枕
簟容我醉時眠

隔浦蓮

大石

新篁搖動翠葆曲徑通
溪窈窕夏果收新脆金丸
落驚飛鳥濃霄迷岸草蛙
聲鬧驟雨鳴沼水亭小
浮萍破處簾花簷影顛倒
綸巾羽扇困臥北窗清曉
屏裏吳山夢自到
驚覺依前身在江表

困一作醉

法曲獻仙音

大石

蟬咽涼柯燕飛塵幕漏閣籤聲時度倦脫綸巾困便
湘竹桐陰半侵朱戶向抱影凝情處時聞打窗雨
耿無語歎文園近來多病情緒嬾尊酒易成間阻縹
緲玉京人想依然京兆眉嫵翠幕淡中對徽容空在
紈素待花前月下見了不教歸去

崔徽善歌舞慕敬中画其形容

過秦樓

大石

水浴清蟾葉喧涼吹巷陌馬聲初斷閒依露井笑撲
流螢惹破畫羅輕扇人靜夜久凭闌愁不歸眠立殘
更箭歎年華一瞬人今千里夢沈書遠空見說鬢
怯瓊梳容銷金鏡漸嬾趁時勻染梅風地溽虹雨苔
滋一架舞紅都變誰信無憀為伊才減江淹情傷荀
倩但明河影下還看稀星數點

荀奉倩妻曹氏有豔色嘗病熱倩以冷身熨之後卒倩歎曰佳人難得再人弔之不哭而傷神無幾倩亦卒

側犯

大石

暮霞霽雨小蓮出水紅妝靚風定看步鞦江妃照明
鏡飛螢度暗草秉燭遊花徑人靜攜豔質追涼就槐
影金環皓腕雪藕清泉瑩誰念省滿身香猶是舊
荀令見說胡姬酒壚寂靜烟鎖漠漠藻池苔井

荀今年十五體能生香避國婚之選遠遁長沙故李端贈郭駙馬詩有焚香荀令偏憐小之句

塞翁吟

大石

暗葉啼風雨窗外曉色瓏璵散水麝小池東亂一岸
芙蓉蘄州簟展雙紋浪輕帳翠縷如空夢遠別淚痕
重淡鈿臉斜紅忡忡嗟憔悴新寬帶結羞豔冶都
銷鏡中有蜀紙堪憑寄恨等今夜洒血書詞剪燭親
封菖蒲漸老早晚成花教見薰風

蘇幕遮

般涉

燎沈香消溽暑鳥雀呼晴侵曉窺簷語葉上初陽乾

宿雨水面清圓一一風荷舉故鄉遙何日去家住
吳門久作長安旅五月漁郎相憶否小楫輕舟夢入
芙蓉浦

浣沙溪

日射欵紅臘帶香風乾微汗粉襟涼碧紗對掩簟紋
光自剪柳枝明畫閣戲拋蓮葯種橫塘長亭無事
好思量

第二

薄薄紗廚望侶空簟紋如水浸芙蓉起來嬌眼未惺
惚強整羅衣擡皓腕更將紈扇掩酥脣羞郎何事
面微紅

第三

翠葆參差竹徑成新荷跳雨淚珠傾曲闌斜轉小池
亭風約簾衣歸燕急水搖扇影戲魚驚柳梢殘日

弄微晴

第四

寶扇輕圓淺畫繒象牀平穩細穿藤飛蠅不到避壺
冰翠枕面涼頻憶睡玉簫手汗錯成聲日長無力
要人凭

點絳脣

征騎初停酒行莫放離歌舉柳汀蓮浦看盡江南路
苦恨斜陽冉冉催人去空回顧淡烟橫素不見揚
鞭處

訴衷情

商調

出林杏子落金盤齒軟怕嘗酸可惜半殘青紫猶有
小脣丹南陌上落花間雨斑斑不言不語一段傷
春都在眉間

片玉集卷之四
丁巳正月初九日晡時寫畢明日立春 陳姬婦予市月矣
姬人初名深蘭予復字之曰雙聲 蓋取春風故實也去冬友
人江西谷作緣於城納之西谷製玉印為賀 寄江七札為
雙姬乞方飲香生手識

片玉集卷之四

片玉集卷之五

秋景

風流子

大石 秋怨

周

邦歲

美成

楓林凋晚葉關河迴楚客慘將歸望一川暝雷雁聲
哀怨半規涼月人影參差酒醒後淚花銷鳳蠟風幕
捲金泥砧杵韻高喚回夢綺羅香減牽起餘悲 亭
皋分襟地難拚處偏是掩面牽衣何況怨懷長結重
見無期想寄恨書中銀鈎空滿斷腸聲裏玉筋還垂
多少暗愁密意惟有天知

華胥引

黃鍾 秋思

川原澄映烟月冥濛去舟如葉岸足沙平蒲根水冷
留雁唼別有孤角吟秋對曉風鳴軋紅日三竿醉頭
扶起還怯 離思相縈漸星星鬢絲堪鑷舞衫歌扇

何人輕憐細閱點檢從前恩愛鳳牋盈篋愁剪燈花
夜來和淚雙疊

宴清都

中呂 愁思

地僻無鍾鼓殘燈滅夜長人倦難度寒吹斷梗風翻
暗雨洒窗填戶賓鴻謾說傳書筭過盡千儔萬侶始
信得庾信愁多江淹恨極須賦淒涼病損文園薇
絃乍拂音韻先苦淮水夜月金城暮草夢魂飛去秋
霜半入清鏡歎帶眼都移舊處更久長不見文君歸
時認否

四園竹

官本作西園竹 小石

浮雲護月未放滿朱扉鼠搖暗壁螢度破窗偷入書
幃秋意濃閒竚立庭柯影裏好風襟袖先知夜何
其江南路繞重山心知謾與前期柰何燈前墮淚腸
斷蕭娘舊日書詞猶在紙鴈信絕清宵夢又稀

向字係舊
校

齊天樂

正宮 秋思

綠蕪凋盡臺城路殊鄉又逢秋晚暮雨生寒鳴蛩勸
織淡閣時聞裁剪雲窗靜掩歎重拂羅裯頓疎花萼
尚有練囊露螢清夜照書卷荆江留滯最久故人
相望處離思何限渭水西風長安亂葉空憶詩情宛
轉凭高眺遠正玉液新筍蟹螯初薦醉倒山翁但愁
斜照斂

木蘭花

高平 暮秋餞別

郊原雨過金英秀風拂霜威寒入袖感君一曲斷腸
歌勸我十分和淚酒古道塵清榆柳瘦繫馬郵亭
人散後今宵燈盡酒醒時可惜朱顏成皓首

霜飛葉

大石

露迷衰草疎星挂涼蟾低下林表素娥青女鬪嬋娟
正陪添悽悄漸颯颯丹楓撼曉橫天魚浪魚鱗小似

故人相看又透入清暉半餉特地留照 迢遞望極
關山波穿千里度日如歲難到鳳樓今夜聽秋風柰
五更愁抱想玉匣哀絃閉了無心重理相思調見皓
牽離恨屏掩孤顰淚流多少

蕙蘭芳引

仙呂

寒瑩晚空點清鏡斷霞孤鷺對客館淡局霜草未衰
更綠倦遊厭游但夢繞阿嬌金屋想故人別後盡日空
疑風竹 塞北氍毹江南圖障是處溫燠更花管雲
牋猶寫寄情舊曲音塵迢遞但勞遠目今夜長爭柰
枕單人獨

塞垣春

大石

暮色分平野倚葦岸征帆卸烟村極浦樹藏孤館秋
景如畫漸別離氣味難禁也更物象供瀟洒念多才
渾衰減一懷幽恨難寫 追念綺窗人天然自風韻

嬾雅竟夕起相思謾嗟怨遙夜又還將兩袖淚珠沈
吟向寂寥寒燈下玉骨爲多感瘦來無一把

丁香結

商調

蒼蘚泂階冷螢粘屋庭樹望秋先隕漸雨淒風迅淡
暮色倍覺園林清潤漢姬紈扇在重吟翫棄擲未忍
登山臨水此恨自古消磨不盡 牽引記試酒歸時
映月同看雁陣寶幄香纓燠象尺夜寒燈暈誰念留
滯故國舊事勞方寸惟丹青相伴那更塵昏蠹損

元夕錄 寄烏程司訓高叔荃五兄札客臘在城解后息
別去今屬渠回杭時相過以踐前約鐙下記

片玉集卷之六

秋景

氏州第一 商調

周 邦彥 美成

波落寒汀村渡向晚遙看數點帆小亂葉翻鴉驚風
破鴈天角孤雲縹緲官柳蕭疎甚尚挂微微殘照景
物關情川途極目頓催人老 漸解狂朋歡意少柰
猶被思牽情繞座上琴心機中錦字覺最縈懷抱也
知人懸望久薔薇謝歸來一笑欲夢高唐未成眠霜
空又曉

解蹀躞 商調

候館丹楓吹盡面旋隨風舞夜寒霜月飛來伴孤旅
還是獨擁秋衾夢餘酒困都醒滿懷離苦 甚情緒
淡念凌波微步幽房暗相遇淚珠都作秋宵枕前雨

此恨音驛難通待憑征鴈歸時帶將愁去

少年遊

商調

并刀如水吳鹽勝雪纖手破新橙錦幄初溫獸烟不
斷相對坐調笙低聲問向誰行宿城上已三更馬
滑霜濃不如休去直是少人行

慶春宮

越調

雲接平岡山圍寒野路回漸轉孤城衰柳啼鴉驚風
驅鴈動人一片秋聲倦途休駕淡烟裏微茫見星塵
埃憔悴生怕黃昏離思牽縈華堂舊日逢迎花豔
參差香霧飄零絃當頭偏憐嬌鳳夜淡簧暖笙清眼
波傳意恨密約匆匆未成許多煩惱只為當時一餉
留情

醉桃源

大石

冬衣初染遠山青雙雲絲雁綾夜寒袖濕欲成冰都

緣珠淚零情黯黯悶騰騰身如秋後蠅若教隨馬
逐郎行不辭多少程

第二

菖蒲葉老水平沙臨流蘇小家畫闌曲徑宛秋蛇金
英垂露華燒蜜炬引蓮娃酒香薰臉霞再來重約
日斜倚門聽暮鷓

點絳脣

仙呂

孤館迢迢暮天草露霑衣潤夜來秋近月暈通風信
今日原頭黃葉飛成陣知人悶故來相趁共結臨
岐恨

夜遊宮

般涉

葉下斜陽照水捲輕浪沈沈千里橋上酸風射眸子
立多時看黃昏燈火市古屋寒窗底聽幾片井桐
飛墜不戀單衾再三起有誰知為蕭娘書一紙

第二

客去車塵未斂古簾暗雨苔千點月皎風清在處見
柰今宵照初弦吹一箭池曲河聲轉念歸計眼迷
魂亂明日前村更荒遠且開尊任紅鱗生酒面

許衷情

商調

隄前亭午未融霜風緊雁無行重尋舊日岐路茸帽
北遊裝期信杳別離長遠情傷風翻酒幔寒凝茶
烟又是何鄉

傷情怨

林鍾

枝頭風勢漸小看暮鴉飛了又是黃昏閉門收返照
江南人去路縵信未通愁已先到怕見孤燈霜寒
催睡早

冬景

紅林擒近

雙調 冬雪

高柳春纔軟凍梅寒更香暮雪助清峭玉塵散林塘
那堪飄風遞冷故遣度幕穿窗侶欲料理新妝呵手
弄絲簧冷落詞賦客蕭索水雲鄉援毫授簡風流
猶憶東梁望虛簷徐轉回廊未掃夜長莫惜空酒觴

第二

冬初

風雪驚初霽水鄉增暮寒樹杪墮毛羽簷牙挂琅玕
纔喜門堆巷積可惜迤邐銷殘漸看低竹翩翩清池
漲微瀾步履晴正好宴席晚方歡亭亭來入冰盤
對山前橫素愁雲變色放杯同覓高處看

滿路花

仙呂

金花落燼燈銀鑠鳴窗雪夜淡微漏斷行人絕風扉
不定竹圃琅玕折玉人新間闊著甚情悰更當恁地
時節無言欹枕帳底流清血愁如春後絮來相接
知他那裏爭信人心切除共天公說不成也還侶伊

收鐙夜微雨錄于雙聲閣

片玉集卷之六

片玉集卷之七

周邦彥 美成

單題

解語花 高平 元宵

風銷焰蠟露浥烘壚花市光相射桂華流瓦纖雲散
耿耿素娥欲下衣裳淡雅看楚女纖腰一把簫鼓喧
人影參差滿路飄香麝因念都城放夜望千門如
畫嬉笑遊冶鈿車羅帕相逢處自有暗塵隨馬年光
是也惟只見舊情衰謝清漏移飛蓋歸來從舞休歌
罷

六么令 仙呂 重九

快風收雨亭館清殘燠池光靜橫秋影岸柳如新沐
聞道空城酒美昨日新醅熟輕鑣相逐衝泥策馬來
折東籬半開菊華堂花豔對列一一驚郎目歌韻

巧共泉聲間雜琮瑤玉惆悵周郎已老莫唱當時曲
幽歡難卜明年誰健更把茱萸再三屬

倒犯 仙呂 新月

霽景對霜蟾乍昇素烟如掃千林夜縞徘徊處漸移
淡窈何人正弄孤影踟躕西窗悄冒霜冷貂裘玉笋
邀雲表共寒光飲清醪 淮左舊遊記送行人歸來
山路寫駐馬望素魄印遙碧金樞小愛秀色初娟好
念漂浮絲絲思遠道料異日宵征必定還相照柰何
人自衰老

大酺 越調 春雨

對宿烟收春禽靜飛雨時鳴高屋牆頭青玉旆洗鉛
都盡嫩梢相觸潤逼琴絲寒侵枕障蟲網吹粘簾竹
郵亭無人處聽暮簷聲不斷困眠初熟柰愁極頻驚
夢輕難記自憐幽獨 行人歸意速最先念流潦妨

車轂怎柰向蘭成憔悴衛玠清羸等閒時易傷心目
未怪平陽客雙淚落笛中哀曲況蕭索青蕪國紅糝
鋪地門外荆桃如菽夜游共誰秉燭庾信小字蘭成

玉燭新 雙調 梅花

溪源新臘後見數朶江梅剪裁初就暈酥砌玉芳英
嫩故把春心輕漏前村昨夜想弄月黃昏時候孤岸
峭疎影橫斜濃香暗沾襟袖 尊前賦與多才問嶺
外風光故人知否壽陽謾鬪終不似照水一枝清瘦
風嬌雨秀好亂插繁花盈首須信道羌管無情看看
又奏

花犯 小石 梅花

粉牆低梅花照眼依然舊風味露痕輕綴疑淨洗鉛
華無限佳麗去年勝賞曾孤倚冰盤同宴喜更可惜
雪中高樹香篝熏素被 今年對花最匆匆相逢似

有恨依依愁悴吟望久青苔上旋看飛墜相將見脆
丸薦酒人正在空江烟浪裏但夢想一枝瀟洒黃昏
斜照水

醜奴兒

大石 梅花

肌膚綽約真仙子來伴冰霜洗盡鉛黃素面初無一
點妝 尋花不用持銀燭暗裏聞香零落池塘分付
餘妍與壽陽

水龍吟

越調 梨花

素肌應怯餘寒豔陽占盡青蕪地樊川照日靈關遮
路殘紅斂避傳火樓臺如花風雨長門淡閉亞簾櫳
半濕一枝在手偏勾引得黃昏淚 別有風前月底
布繁英滿園歌吹朱鉛退盡潘妃却酒昭君乍起雪
浪翻空粉裳縞夜不成春意恨玉容不見瓊英謾好
與何人比

六醜

中呂 落花

正單衣試酒悵客裏光陰虛擲願春暫留春歸如過
翼一去無迹為問家何在夜來風雨送楚宮傾國釵
鈿墮處遺香澤亂點桃蹊輕翻柳陌多情更誰追惜
但蜂媒蝶使時叩窗福 東園岑寂漸蒙籠暗碧靜
繞珍叢底成歎息長條故惹行客侶牽衣待話別情
無極殘英小強簪巾幘終不似一朵釵頭顫裊向人
敬側漂流處莫趁潮汐想斷鴻尚有相思字何由見
得

虞美人

正宮

金閨平帖春雲煖晝漏花前短玉顏酒解豔紅銷一
面捧心啼困不成嬌 別來新翠迷行徑窗鎖玲瓏
影研綾小字夜來封斜倚曲闌凝睇數歸鴻

第二

廉纖小雨池塘徧，細點看萍面。一雙燕子守朱門，比
侶尋常時候，易黃昏。空城酒泛浮香絮，細作更闌
語。相將羈思亂如雲，又是一窗燈影兩愁人。

二十日錄適有客招飲託故辭之捷戶錄此

片玉集卷之七

片玉集卷之八

周邦彥 美成

單題

蘭陵王 越調 柳

柳陰直，烟裏絲絲弄碧。隋隄上，曾見幾番，拂水飄緜
送行色。登臨望故國，誰識京華倦客。長亭路，年去歲
來，應折柔條過千尺。 閒尋舊蹤跡，又酒趁哀絃，燈
照離席。梨花榆火催寒食。愁一箭風快，半篙波暖，回
頭迢遞，數驛望人在天北。 悽惻恨堆積，漸別浦
縈回，津埃岑寂。斜陽冉冉春無極。念月榭攜手，露橋
聞笛。沈思前事，似夢裏，淚暗滴。

蝶戀花 商調 柳

愛日輕明新雪後，柳眼星星，漸欲穿窗牖。不待長亭
傾別酒，一枝已入騷人手。 淺淺接藍輕臘，透過盡

冰霜便與春爭秀，強對青銅簪。白首老來風味難依。
舊

第二

桃萼新香梅後，暗葉藏鴉。苒苒垂亭牖，舞困低迷如
中著酒亂絲偏近遊人手。雨過朦朧斜日透，客舍
青青特地添明秀。莫話揚鞭回別首。渭城荒遠無交
舊。

第三

蠢蠢黃金初脫後，暖日飛絲。取次粘窗牖，不見長條
低拂酒贈行應已輸先手。鸞擲金梭飛不透，小樹
危檠處處添奇秀。何日隋隄縈馬首，路長人遠空思
舊。

第四

小閣陰陰人寂後，翠幕褰風。燭影搖疎牖，夜半霜寒

初索酒金刀正在柔夷手。綵薄粉輕光欲透，小葉

初索酒金刀正在柔夷手。綵薄粉輕光欲透，小葉

佳麗地南朝盛事誰記，山圍故國繞清江。髻鬟難起，
怒濤寂寞打孤城。風檣遙度天際斷，崖樹猶倒倚。莫
愁艇子曾繫空遺舊迹，鬱蒼蒼霧沈半壘。夜淡月過
女牆來賞心東望淮水。酒旗戲鼓甚處市想依稀。
王謝鄰里燕子不知何世，入尋常巷陌人家相對。如
說興亡斜陽裏。丁晉公作賞心亭。

歸去難 仙呂 期約

佳約人未知，背地伊變惡。會稱亭事看淡淺，如今信
我委的論長道遠。好禾無可怨，洎合教伊因些事後
分散。密意都休待說先腸斷，此恨除非是天相念。

冰霜便與春爭秀，強對青銅簪。白首老來風味難依
舊。

第二

桃萼新香梅後，暗葉藏鴉。茸茸垂亭牖，舞困低迷如
中著。酒亂絲偏近遊人手。雨過朦朧斜日透，客舍
青青特地添明秀。莫話揚鞭回別首。渭城荒遠無交
舊。

第三

蠢蠢黃金初脫後，暖日飛絲。取次粘窗牖，不見長條
低拂酒。贈行應已輸先手。鸞擲金梭飛不透。小樹
危檠處處添奇秀。何日隋隄縈馬首。路長人遠空思
舊。

第四

小閣陰陰人寂後，翠幕褰風。燭影搖疎牖，夜半霜寒

初索酒金刀正在柔夷手。綵薄粉輕光欲透。小葉
尖新未放，雙眉秀，記得長條垂鷓首。別離情味還依
舊。

西河

大石 金陵

佳麗地，南朝盛事誰記。山圍故國，繞清江，髻鬟難起。
怒濤寂寞，打孤城，風檣遙度。天際斷崖，樹猶倒倚。莫
愁艇子曾繫。空遺舊迹，鬱蒼蒼，霧沈半壘。夜溪月過，
女牆來賞心，東望淮水。酒旗戲鼓甚處市，想依稀，
王謝鄰里。燕子不知何世，入尋常巷陌，人家相對。如
說興亡，斜陽裏。丁晉公作賞心亭。

歸去難

仙呂 期約

佳約人未知，背地伊變惡。會稱亭事看淡淺，如今信
我委的論長道遠。好禾無可怨，洎合教伊因些事後
分散。密意都休待說先腸斷。此恨除非是天相念。

堅心更守未死終相見多少閒磨難到得其時知他
做甚頭眼

三部樂 商調 梅雪

浮玉飛瓊向邃館靜軒倍增清絕夜窗垂練何用交
光明月近聞道官閣多梅趁暗香未遠凍蘂初發倩
誰摘取寄贈情人桃葉 回文近傳錦字道為君瘦
損是人都說祇知染紅著手膠梳粘髮轉思量鎮長
墮睫都只為情淡意切欲報消息無一句堪愈愁結

菩薩蠻 正平 梅雪

銀河宛轉三千曲浴鳧飛鷺澄波綠何處是歸舟夕
陽江上樓 天憎梅浪發故下封枝雪淡院捲簾看
應憐江上寒

品令 商調 梅花

夜闌人靜月痕寄梅梢疎影簾外曲角闌干近舊攜

手處花發霧寒成陣 應是不禁愁與恨縱相逢難
問黛眉曾把春衫印後期無定斷腸香消盡

玉樓春 仙呂 惆悵

玉琴虛下傷心淚只有文君知曲意簾烘樓迴月空
人酒煖香融春有味 萋萋芳草迷千里惆悵王孫
行未已天涯回首一消魂二十四橋歌舞地

黃鸝繞碧樹 雙調 春情

雙闕籠嘉氣寒威日晚歲華將暮小院閒庭對寒梅
照雪淡烟凝素忍當迎景動無限傷春情緒猶賴是
上苑風光漸好芳容將煦 草莢蘭芽漸吐且尋芳
更休思慮這浮世甚驅馳利祿奔競塵土縱有魏珠
照乘未買得流年住怎如盛飲流霞醉偎瓊樹

滿路花 仙呂 思情

簾烘淚雨乾酒壓愁城破冰壺防飲渴培殘火朱消

粉褪絕勝新梳裏不是寒宵短日上三竿
人猶要同臥如今多病寂寞章臺左黃昏
風弄雪門深鎖蘭房密愛萬種思量過也
須知有我著甚情悰你但忘了人呵

廿一日午後錄鼎上人來得赤荃消息蟬隱記

片玉集卷之八

片玉集卷之九

雜賦

綺寮怨

中呂 思情

周邦彥 美成

上馬人扶殘醉曉風吹未醒映水曲翠瓦朱簷垂楊
裏乍見津亭當時曾題敗壁罩淡墨苔暈青念去來
歲月如流徘徊久歎息愁思盈去去倦尋路程江
陵舊事何曾再問楊瓊舊曲淒清斂愁黛與誰聽尊
前故人如在想念我最關情何須渭城歌聲未盡處
先淚零

拜星月慢

高平 秋思

夜色催更清塵收露小曲幽坊月暗竹檻燈窗識秋
娘庭院笑相遇似覺瓊枝玉樹暖日明霞光爛水盼
蘭情揔平生稀見畫圖中舊識春風面誰知道自

到瑤臺畔春戀雨潤雲橫苦驚風吹散念荒寒寄宿
無人館重門閉敗壁秋蟲歎怎奈何一縷相思隔溪
山不斷

尉遲杯

大石 離恨

隋隄路漸日晚密靄生淡樹陰陰淡月籠沙還宿河
橋淡處無情畫舸都不管烟波隔南浦等行人醉擁
重衾載將離恨歸去 因念舊客京華長偎傍疎林
小檻歡聚冶葉倡條俱舊識仍慣見珠歌翠舞如今
向漁村水驛夜如歲焚香獨自語有何人念我無慘
夢魂疑想鴛侶

繞佛閣

大石 旅情

暗塵四斂樓觀迥出高映孤館清漏將短厭聞夜久
籤聲動書幔桂花又滿閒步露草偏愛幽遠花氣清
婉望中迤邐城陰度河岸 倦客最蕭索醉倚橋穿

柳線還似汴隄虹梁橫水面看浪颭春燈舟下如箭
此行重見歎故友難逢羈思空亂兩眉愁向誰舒展

一寸金

小石 江落

洲夾蒼崖下枕江山是城郭望海霞接日紅翻水面
晴風吹草青搖山脚波暖鳧鷖作沙痕退夜潮正落
疎林外一點炊烟渡口參差正寥廓 自歎生經年
何事京華信漂泊念渚蒲汀柳空歸閒夢風輪雨楫
終辜前約情景牽心眼流連處利名易薄回頭謝冶
葉倡條便入漁釣樂

蝶戀花

商調 秋思

月皎驚鳥棲不定更漏將殘轆轤牽金井喚起兩眸
清炯炯淚花落枕紅絲冷 執手霜風吹鬢影去意
徊徨別語愁難聽樓上闌干橫斗柄露寒人遠雞相
應

如夢令

中呂

思情

塵滿一絢文繡淚濕領巾紅
皺初煖綺羅輕腰勝武昌
官柳長晝長晝困臥午窗中
酒

第二

閨情

門外迢迢行路誰送郎邊尺
素巷陌雨餘風當面濕
花飛去無緒無緒閒處偷垂玉
筍

月中行

怨恨

蜀絲趁日染乾紅微煖面脂融
博山細篆鬻房櫳靜
看打窗蟲愁多膽怯疑虛幕
聲不斷暮景疎鍾團
團四壁小屏風啼盡夢魂中

浣沙溪

黃鍾

日薄塵飛官路平眼前喜見汴河傾
地遙人倦莫兼
程下馬先尋題壁字出門閒記榜
村名早收燈火
夢傾城

第二

貪向津亭擁去車不辭泥雨濺羅
襦淚多脂粉了無
餘酒釀未須今客醉路長終是少
人扶早教幽夢
到華胥

第三

不為蕭娘舊約寒何因容易到長
安預愁衣上粉痕
乾幽閣淡沈燈焰喜小爐鄰近酒
盃寬為君門外
脫歸鞍

點絳脣

仙呂

傷感

遼鶴歸來故鄉多少傷心地寸書
不寄魚浪空千里
憑仗桃根說與相淒涼意愁無際
舊時衣袂猶有
東門淚

少年遊

黃鍾

樓月

簷牙縹緲小倡樓涼月挂銀鈎
聒席笙歌透簾燈火

風景似揚州 當時面色欺春雪 曾伴美人遊 今日
重來更無人問 獨自倚闌愁

望江南 大石 詠妓

歌席上無賴是橫波 寶髻玲瓏欺玉燕 繡巾柔膩掩
人好自宜多 無箇事因甚 斂雙蛾 淺淡妝梳疑見
畫惺鬆 言語勝聞歌 何況會婆娑

廿三日錄積雨陰寒 穠女笄年初度

片玉集卷之九

片玉集卷之十

雜賦 意難忘 中呂 美詠 周 邦彥 美成

衣染鶯黃愛停歌 駐拍勸酒持觴低鬟蟬影動私語
口脂香蓮露冷竹風涼 拚劇飲淋浪夜漸深 籠燈就
月子細端相 知音見說無雙解 移宮換羽未怕周
郎長顰知有恨 貪耍不成妝些箇事 惱人腸 試說與
何妨 又恐伊尋消問息 瘦減容光
周瑜少精音樂雖三爵之後其有關誤瑜必知之必顧故時人語曲有誤周郎顧

迎春樂 雙調 攜妓

人人花豔明春柳 憶筵上偷攜手 趁歌停舞罷來相
就 醒醒箇無些酒 比目香囊新刺繡 連隔座一時
熏透 為甚月中歸長是他隨車後

定風波 商調 美情

莫倚能歌斂黛眉此歌能有幾人知他日相逢花月底重理好聲須記得來時苦恨城頭更漏永無情豈解惜分飛休訴金尊推玉臂從醉明朝有酒遣誰持

紅羅襖

大石 秋悲

画燭尋歡去羸馬載愁歸念取酒東壚尊壘雖近采花南浦蜂蝶須知自分袂天闊鴻稀空懷夢約心期楚客憶江籬筭宋玉未必為秋悲

玉樓春

大石

當時攜手城東道月墮簷牙人睡了酒邊難使客愁驚帳底不教春夢到別來人事如秋草應有吳霜

侵翠葆夕陽淡鎖綠苔門一任盧郎愁裏老

盧家子年暮為校書

郎始娶崔氏崔有詞翰結縭之微有嫌色盧因請詩為戲崔立成曰不怨檀郎年幾大不怨檀郎官職卑自恨妾身生較晚不見盧郎年少時

第二

大隄花豔驚郎目秀色穠華看不足休將寶瑟寫幽懷座上有人能顧曲平波落照涵潁玉畫舸亭亭浮澹淥臨分何以祝深情只有別離三萬斛

第三

玉奩收起新妝了鬢畔斜枝紅裊裊淺顰輕笑百般空試著春衫猶更好裁金簇翠天機巧不稱野人簪破帽滿頭聊插片時狂頓減十年塵土貌

第四

桃溪不作從容住秋藕絕來無續處當時相候赤闌橋今日獨尋黃葉路煙中列岫青無數鴈背夕陽紅欲暮人如風後入江雲情似雨餘粘地絮

夜飛鵲

正宮

別情

河橋送人處涼夜何其斜月遠墮餘輝銅盤燭淚已流盡霏霏涼露霑衣相將散離會撥風前津鼓樹杪

參旗華驄會意縱揚鞭亦自行遲
迢遞路回清野人語漸無聞空帶愁歸何意垂紅滿地遺鈿不見斜
徑都迷免葵燕麥向殘陽影與人齊但徘徊斑草啼
嗟酹酒極望天西

早梅芳

正宮

別恨

花竹溪房櫳好夜閒無人到隔窗寒雨向壁孤燈弄
餘照淚多羅袖重意密鶯聲小正魂驚怯門外已知
曉去難留話未了早促登長道風披宿霧露洗初
陽射林表亂愁迷遠覽苦語縈懷抱謾回頭更堪歸
路杳

第二

牽情

繚牆深叢竹繞宴席臨清沼微呈纖履故隱烘簾自
嬉笑粉香妝暈薄帶緊腰圍小看鴻驚鳳翥滿座歎
輕妙酒闌時人醉了回首城南道河陰高轉露脚

斜飛夜將曉異鄉淹歲月醉眼迷登眺路迢迢恨滿
千里草

鳳來朝

越調

佳人

逗曉看嬌面小窗深弄明未徧愛殘朱宿粉雲鬢亂
最好是帳中見說夢雙蛾微斂錦衾溫酒香未斷
待起難捨拚任日炙画闌暖

芳草渡

別恨

昨夜裏又再宿桃源醉邀仙侶聽碧窗風快朱簾半
捲疎雨多少離恨苦方留連啼訴帳曉匆匆
獨自歸去愁靚滿懷淚粉瘦馬衝泥路謾回首
烟迷望眼依稀見朱戶似癡似醉暗損凭闌情緒
澹暮色看盡棲鴉亂舞

感皇恩

大石

標韻

露柳好風標嬌鶯能語獨占春光最多處淺顰輕笑

未宵等閒分付爲誰心子裏長長苦
洞房見說雲
淡無路憑仗素鸞寄情素酒空歌斷又被濤江催渡
怎柰向言不盡愁無數

虞美人 正宮

燈前欲去仍留戀腸斷朱屏遠不須紅雨洗香腮待
得薔薇花謝便歸來舞腰歌板閒時按一任傷人
看金爐應見舊殘煤莫遣恩情容易似寒灰

第二

一本無此首

淡雲籠月松溪路長記分攜處夢魂連夜繞松溪此
夜相逢恰似夢中時海山陟覺風光好莫惜金尊
倒柳花吹雪燕飛忙生怕扁舟歸去斷人腸

又

疎籬曲徑田家小雲樹開清曉天寒山暮有無中野
外一聲鐘起送孤蓬添衣策馬尋亭堠愁抱惟空

酒菰蒲睡鴨占陂塘縱被行人驚散又成雙

第三

玉觴纔掩朱絃悄彈指壺天曉回頭認猶倚牆花只
向小橋南畔便生天涯銀蟾依舊當窗滿顧影魂先
斷淒風猶颭半殘燈擬倩今宵歸夢到雲屏

天休二字
係舊校

校寫原本元喬夢符樂府畢接鈔此卷又借到陳允平西麓
繼周集蓋和清真詞也勘定此帙行將鈔之廿九日丹鉛精
舍識是月小盡



